

四庫全書

集部

欽定四庫全書

西山文集卷五十二

宋 真德秀 撰

祝文

鎮安廟祝文

迺者吾鎮秀民歲以上春良日相帥祇薦于神因飲福
焉所以答鴻休而迓靈貺也某以持節過蒙獲與斯會
敢陳菲奠因控悃忱吁自慶元龍飛以來南宮捷音不

聞於鎮人之耳者蓋十四年于今矣豈神無意於此邦之士其寥寥而弗嗣也明天子將復下求士之詔惟神其大庇茲土俾濯纓天池驤首霄漢者繼踵而起豈非神之大賜乎仰翳明靈鑒此誠禱

廣惠廟祝文

乙亥
建康

嗚呼江東之民困敝最甚者莫如桐汭旱蝗之裁酷烈最甚者又莫如今歲夫以甚困敝之民而遇甚酷烈之裁幾何其不化而為餒鬼流而為餓隸此某之所以朝

夕憂危思所以拯救者如其躬之疾癘然而賙卹賑濟
凡人力之所可為者有司固不敢辭其責至於均調雨
暘銷弭災沴凡人力之所不到者非神其曷有濟維王
自廟食于茲土凡幾百載矣民恃王以為父母有水旱
而必祭今嗷嗷之氓有甚於赤子之待乳哺神之仁亦
豈忍坐視其將斃歟命幙僚展謁祠下所以赴愬於王
者如此惟哀恫斯民而亟救之更千百年其敢忘神之
大惠

中元水府廟祝文

某自春徂冬三至采石而三謁王顧豈有私禱哉以王之威神歛硅震耀能相上帝而澤下民故也今民病劇矣若冬又無雪則無麥春又無雨則無禾哀我人斯將隕溝壑王其忍聞之乎迺者飛霰之祥效于日至矣惟神終此大惠使一臘三白以祛沴氣而兆豐年若乃田事既興膏澤時至茲尤農人之所跂望者王其哀痼斯民民亦世世事王無怠

廣惠廟祝文

廣德相廟

於虞王之神功聖德衣被天下而靈響震發寔肇乎此
邦猶日升嵎夷而燭萬國江出昆侖而吞百川也某自
行西方遇王之祠未嘗不肅然起敬况於巍巍炳炳衆
廟之所祖虞揆日之良闕
若
其區區為民致請者則敬心以禱又隙茲闕
誠闕
然可貫白日

廣惠廟祝文

世以仲春關日為王始生四方士女大會于祠下是非有無蓋不可攷矣然於此乃見人心歸戴之切焉夫民視王為父母而謂王不以子視斯民者愚不信也今江東之民艱食方甚亡異於赤子之失乳惟王以父母之心哀之救之以全其生而塞其望幸甚

范忠宣公祝文

維嘉定九年歲次丙子二月甲申朔初四日丁亥故丞相忠宣范公祠堂成具位真某謹率僚屬以羊一豕一

告祠于公曰嗚呼治平之元公自畿縣來漕江東曾未
數月入為御史故其行事不少概見獨其所賦籌思堂
之詩刻石猶在誠通造化念其羣生有德之言隨寓發
見茲非為政者所當矜式乎是用闢堂之東楹敬祀遺
像以寓高山仰止之意若夫立朝之大節行己之大方
誓以沒齒惟公是則明靈不泯實監此心

廣惠廟祝文

之為郡介乎浙右而隸乎江東然殿甚瘠

闕

則負異乎江浙之風以下下上之賦雖粒米狼
戾且糞其田而不足況於逢歲之艱凶既前驅以旱魃
之虐燄兮又後繼以妖蝗之銛鋒環千里皆赤地兮况
望其櫛比與崇墉赤子嗷嗷而誰愬兮分捐瘠於溝中
嗟人力其奚施兮賴神明之哀恫雪霏霏其三白兮又
零雨之濛濛既優渥而霑足兮獲及時而趨工顧某之
何知兮屢干瀆乎靈聰蓋隨扣而隨應兮噌吰之鴻鍾
豈某之愚足以動神聽兮蓋神之愛人故頻鑒乎微衷

瞻藜藿之被野森雲濤之翻空苟兼旬之明霽即坐收
其全功神既加惠於其初兮顧豈惜委貺於其終冀燥
濕之孔時俾黍禾之偕豐易枯槁而芳潤轉愁慘而春
融某將大書特書以紀神之休應兮期焜耀於無窮

諸廟禳蝗祝文

在詩有之去其螟螣及其蠹賊毋害我田穉夫此人事
也乃以屬諸田祖之神何哉蓋禦菑弭患在神為之則
易而在人為之則難日者本道郡邑以蜾生聞天子有

詔俾長吏禱于山川百神之祠是亦周先王意也惟王廟食歲久陰威赫然霆奔風馳山嶽可撼况區區蟲蝗之孽乎驅之攘之以升炎火是直噫吹間耳虔共致祈立俟嘉應

廣惠廟祝文

某間者伏謁祠下敬以三事有祈于王威靈赫然隨答如響綸音誕頒錫以廩粟為萬石

闕

仰哺

之民賴以無饑又聞歲除至於人日嘉雪頻仍宿麥蒙

潤非王之慈仁密賜覆露其何以底茲某與二邑十有四鄉之人同深抃蹈惟是溪湖之流尚梗舟楫之運猶難一雨霈然使千艘浮動此尤朝夕之所企望者惟王其終惠之

奉安范忠宣公祠堂祝文

故丞相忠宣高平范公廼者仲春即籌思堂東楹以安公像雖有以見區區尊賢尚德之心然其規撫簡陋氣象卑狹每欲然為之不滿也夏田告登振廩訖事既新

貢宇遂建斯堂撰日之良載嚴登奉冠劍山立德容穆
然熙寧立朝之英風元祐當軸之盛烈凜乎其在目也
九泉可作吾誰與歸秋菊寒泉薦此芳潔茲誠炯炯公
其鑒之

辭夫子廟祝文

建寧

昔者先聖之門果如由藝如求然後許以從政某也器
凡而學陋曾未及二子之彷彿而叨恩出使遽寄以一
道生靈休戚之命宜其不足以稱塞也然節用愛人之

訓拳拳服膺者未始一日而不敬奉詔守泉遂將去此
誓當益尊所聞而行所知以終無負聖門之律令尚饗

明道祠堂祝文

明道先生其年未弱冠已知誦夫子之遺書雖一命之
士當存心於愛物況於乘使者之車然學力未充其愧
於民者多矣叨恩假守誓當服膺訓言益求所以用力
者庶幾有以贖今日之過乎尚饗

東南嶽廟等處祝文

某書生為吏無以瘡人惟有不欺皎如星日賴神之賜
訖遂終更詰朝有行不敢不告尚饗

范忠宣公祝文

故丞相忠宣高平范公廼者建公之祠於治舍瞻仰

而取則焉今雖去此然積有遺書殆亡異

闕

奉香火於左右也以責人之心責己恕己之心恕
人誓畢此身毋忘明訓尚饗

劉忠肅公祝文

嗚呼公生於建水而沒於金陵光明秀傑之氣當已融
而為喬嶽燦而為列星至於論議之崇宏事業之雋偉
播在簡冊者又將垂千載之儀刑某以鄉閭晚出雖不
及執經於堂下然讀公之書友公之子猶彷彿其平生
竭來江左屬歲饑饉鮐背黃髮之叟誦乙未掾菑之績
往往歔歔而涕零某之視公無能為役獨於遺訓之炳
然者每拳拳而服膺其於患孤恤鰥之政既嘗竊取其
一二復刊梓以布之海內庶幾傳此方挾此藥者皆足

以起沈瘵而蘇醒被命守泉謹拜謁祠下而去繼自今
強學力行益當思所以自厲者上以無怠於師訓下以
不辱於鄉評尚饗

鎮安廟祝文

某不_闕 恩列位于朝者凡八年莫遽於禁林史莫_闕

重於稽古禮文之事而某也獲有所復玷_闕

使指可謂幸矣非神之_闕

靈潛_闕

佑其何以逮茲懷紱過家敬謁祠下惟神推所以福

某者而均福於一方俾珪組蟬聯嗣是愈盛豈非衆心之大願乎不腆酒殽具將誠意

辭廣惠廟祝文

某將指二年無補於民乃若民瘼以告而適應親疾以懇而旋愈則皆有賴乎神神之有大造於某也蓋與覆燾而惟均被命守泉敬謁祠下而去若夫繕營之需則已付諸幕屬豈足仰報於靈休姑以少酬其夙心云爾

梨山廟祝文

惟神以唐名賢膺宋祀典封爵之崇極于二等威德之
盛被于一方富沙之民飲食必祭蓋無異子之於父母
也某承詔守泉道出鄉郡誼當躬謁祠下而迫於午役
遂不克前敬馳辦香遠布誠悃維今此行屬當大夏高
堂有母華髮颯然走陸浮川衝暑履濕人子之心不無
憂虞伏惟聖靈密賜擁佑俾起居飲食無異平時壽祿
康寧益受多祉是神有大造於某也期以代還躬伸報
謝茲誠炯炯王其鑑之

梨山廟祝文

某復有微悃干冒聖威仰惟靈佑善應廣濟昭惠王在
唐之季來守建安實有惠政故自騎雲帝鄉之後邦人
懷之廟于梨山以祀以享著于唐史事迹可稽此學古
之士所共知也惟是詩篇遺文藏在三館學者無自而
見焉某願以私錢刊于廟中庶永其傳且俾奉祠祝者
嚮之以為香火之助惟神其幸聽之

梅山廟祝文

五顯王惟神封爵之崇極于二等威德之盛被于四方
瞻是仙山有嚴廟食邦人欽戴奉祀尤虔某承詔守泉

以下並
同梨山

又

某復有微悃干冒聖威某昨在奉常獲見徽饒二州所
奏加封五顯王本末皆謂神姓曰蕭伯仲五人今考之
建安誌神之姓氏伯仲皆與徽饒廟同已封至六字王
梅仙之祠乃尚仍五通

闕

竊所未安某與郡人同請于漕臺綸告

闕

與婺源德興二廟封爵一體顯聖靈聿

闕

觀聽惟神其幸聽之

謁先聖廟文

泉州

某不佞幼讀先聖之書至於道千乘之國敬事而信節
用而愛人使民以時未嘗不喟然三嘆以為苟得千里
之地而為之守則斯言也真樂石之良規槃杆之至誠
也今天子不以為愚且陋擢守南土茲非推行所學之

日乎夫一事之不謹不可以言敬一令之非誠不可以
言信錙銖濫費不得為節用毫髮橫取不得為愛人一
役之妄興則非時使之義某雖不敏敢違初心惟不得
罪於此邦之民然後為無負先聖之訓神靈如在尚監
此心

社稷祝文

某叨被恩除假守茲土載惟社稷民命所依祗奉故常
按行封疆用嚴國典式對神休謹告

諸廟祝文

惟上帝以好生為心肆命諸神以奠方域聖天子以憂
民為心故環千里付之守焉幽明雖殊其所以為民則
一而已某猥以非材承乏茲土凡其職之所當為與力
之所可任者不敢不盡其方若夫均調雨暘銷弭菑害
則非神乎孰賴尚惟陰相以康斯人豈惟民荷寵靈某
亦與受無窮之賜

東嶽祝文

五方有嶽祭秩畧同而岱宗之祠獨周徧于天下者以其居平秩之方而主生育之事故也某猥以非材來守茲壤凡可以致力於民不敢不盡其方

下同前

趙忠簡祝文

惟公以忠正德文為中興名相第一某高山仰止于茲有年被命此來獲踵公武於八十年之後緬懷遺烈凜然若存何以薦誠惟此卮酒

韓中令祝文

惟公以景德丁未來守此邦盛德格天寔生人傑是宜
父子並祠至今載瞻儀刑敢不起敬

王詹事祝文

瞻是泉山為一都會牧守相望多時名臣惟梅溪公遺
愛尤盛蓋其所以修身治人者一出於闕

愈久不替某自少小即嘗誦公闕

詩仰止高山于茲有日敢圖僥倖闕

四十七年之間方將朝夕勉焉以闕

茲誠炯炯公其鑒之

蔡端明祝文

惟公以忠言惠政著于中外至和之世實自畿甸來守此邦以便親輿之奉流風善政人到于今稱之某之視公無能為役然間者九重假寵之意明著訓詞實用仁祖命公故事顧惟不佞將何以堪之惟當仰止高風以庶幾其萬一英靈如在尚聞斯言

顏尚書

徐都承

程尚書祝文

惟公以法從名臣嘗鎮茲土實有遺愛在其邦人尸而
祝之迄今未泯某祇事云始謁見惟勤載瞻儀刑肅然
起敬

姜相公祝文

泉州南安縣

嗚呼公以鯁亮之資盡言於猜忌之主一斥不復沒于
遐陬然清風直節千載而下猶凜凜有生氣彼脂韋輒
美寵竊一時而遺臭無極者未知孰為得失也茲因祠
事庸歎幽宮酌以一卮喟然三嘆

開溝告諸廟祝文

地之有溝渠猶身之有血脈也血脈宣暢則體安而氣和一或底滯則疾疢生矣某被命來此考按圖志則知郡縣之溝堙闕歲久蓋自林侯祈之後未有再議開濬者淤泥惡水停蓄弗流春秋之交蒸為癘疫州人病之匪一日矣顧念庸拙泣事方新懼於煩民未敢輕議而寓公同僚交相勸勉謂將興悠久之利不可憚信宿之勞博參與言亦以為便乃消良日命庀工徒維城與隍

神職是主威靈赫然尚克顯相使畚鋤之下如掃浮埃
役者不勞而功以克就此州人之幸也某之願也

到任謁韓魏王祝文

我宋盛時莫如嘉祐伊誰輔相曰韓與曾惟宣靖公固
為泉人若忠獻王則又生於泉者也山川之靈鍾此人
傑顧不偉與郡圃有祠寔惟育德孕賢之地高冠大劍
儼如生存某祗役云初敬伸款謁若夫法公之所以治
相治魏者而治泉顧雖無庸其敢不勉英靈未泯實聞

斯言

開湖祝文

郡東有湖其來尚矣在慶元中守臣劉公頴實命開濬
平疇萬畝灌溉所資其利一也以固風氣以壯形勢其
利二也廣仁聖好生之德寓臣子報上之恭其利三也
而二十年間有司因循浸不訾省枯涸浸甚某甚懼焉
捐庫緡以募工當農隙而舉事庶幾民蒙其利而不知
勞仰繫明靈尚克陰相功以亟就則報其敢也

修城告諸廟祝文

郡之有城以藩衛也。比歲守臣嘗一新之矣。曾未數載復以圯聞。某自玷州符。即屬意乎此。而重用民力。不敢輕輒舉。以至于今。茲因農隙。稍加繕治。力所未及者。則以俟。後之人仰翳明靈。尚克顯相。俾即數旬之近。而成百雉之功。某之願也。邦人之幸也。

土神祝文

守臣之職。實曰捍城。城圯不修。咎將誰任。三農之隙。以

漸繕完惟神其相之幸甚謹告

春祈祭諸祠祝文

謹以清酌脯修之奠祭于某神古者春秋祈報之禮惟施於社稷載芟良耜之詩是也今併及於廟貌之神盖以水旱蟲螟之禱於是乎在有不可得而廢者若夫先賢之祠特以寓邦人去思之意而非為祈禳設也考諸舊儀有未安者不量其愚輒用釐正自今以始釋奠于先聖之明日則遣官以祠而繫祈報之禮庶幾於義為

得惟神其幸鑒之

諸廟祝文

春之有祈故事也而某勤勤為民之心則不敢以故事視也前者祭饌之非既改而用牲矣此復申戒攸司益虔厥事凡所以盡內心之誠而冀神之或饗也然豈有他求哉雨暘以時疫癘不作使民有為生之樂而無戚嗟愁恨之聲吏之所望於神者惟此而已洋洋如在實聞斯言仰翳明靈賜以饗荅

慈濟廟祝文

維古之制捍患禦灾有功於民始在祀典神之生也以
和扁之技妙起死之功颯遊既升靈嚮益著此邦之民
不幸有疾求救於神者如子之懇其親神亦隨其所苦
救而療之如親之愛其子嗚呼其可謂捍患禦灾有功
於民者已矣歲時常祀乃未及與非闕典歟載念此邦
密邇南土闕疫癘易生春夏之交多以病告斷
以今始著為定例一歲兩祠于神仰惟英靈監此誠悃

俾民無疾痛之苦則吏亦免休迫之憂將千萬年承事
無斁

慈濟廟祝文

四月
二日

某以踈庸繆膺郡寄眡民之疾猶已隱憂今春以來二
氣均調札瘥不作繫神之庇朝夕不敢忘乃者閭巷郊
野之間漫有以病告者與其既甚然後有祈于神豈若
及其尚微亟控斯禱惟神哀恫庶俗亦願有以揀之於
其初庶幾民之獲全者多而神之用力也易吏既獲免

其責而民亦事神益欽豈不美哉

為民患痢告慈濟廟祝文

傳曰父母惟其疾之憂言親之於子惟恐其有疾也郡
之有守所以父母斯民也民有疾而守不加恤可乎今
閭巷之間以痢下為苦者衆守能閔之而不能救之既
有愧於民矣神能救之而守不以告其罪當何如哉肆
命元幘致祈于神神其救之使病者有瘳而未病者獲
免豈惟闕亦將謂神之德於無窮

東山南北岸兩渡祝文

間者以渡舟之多溺也深惟長利欲睽百艘而橋之蓋嘗以諗于神矣而議者不以為便夫見其可而圖之與慮其不可而遂止凡皆為民而已然新路改築舍迂而近其鉅舟更創去危即安亦不可謂非悠久之利也惟神嘿有以相之俾無風波衝盪之虞無魚龍噬齧之患行者濟者各適其所安民亦永永戴神之賜

北山清涼洞祈雨祝文

嘉澤久曠麤糲將萎共惟守土之臣寔掌劭農之政雖
冬而禱雨蓋往昔之未聞然志切念民豈故常之可徇
用殫忱悃仰扣真祠山改名山願及斯時亟降蘇枯之澤庶
幾嗣歲免貽艱食之憂

北山謝雨祝文

間以早暵有禱于神雲興雨濡旋荷嘉應芄芄之苗將
槁復茂神之為賜大矣然自今至于秋成無非望雨之
日惟神終始大賜使膏澤時至卒歲豐年實邦人之慶

也亦守土者之幸也

諸廟謝雨祝文

比以甘澤久曠懇禱未孚夙夜以思不勝震懼維神血食此方與守土之吏同任其責令茲一雨沛然萬物吐氣不惟為吏者得以少寬其憂而神亦為不失職矣然而焦枯雖解滲漉未深若能大赫厥靈使滂沱之澤飽足民望則拜神之賜有加無已祇答嘉貺輒私布之

忠孝祠堂奉安祝文

具位真某謹率僚屬以清酌之奠昭告于旌表義闕林
公司空忠勇蘇公某不佞奉天子之命來綰虎符視事
之初考按圖志則知此邦前哲有如林公之純孝至行
蘇公之精忠大節光明卓絕標準百世既祠于郡學使
為士者知所勸又祠于通衢使凡居是邦與往來之人
皆有所瞻仰嗚呼世降俗末為人子而不葬其親與葬
而不以禮者有矣視林公之躬自陶甓負土成墳者何
如哉為人臣而欺其君與臨小利害而選悞畏避者有

矣視蘇公之舍生取義以死償節者何如哉祠像告新
敬伸款謁清風如在嘆仰不忘

諸廟祈雨祝文

聖經所載惟麥與禾今禾既登場所至告稔拜神之賜
渥矣乃季秋以來雨不時至高田之麥欲種而無水以
耕下田之麥已種而無水以溉此農人之所甚憂况夫
風高氣燥則居者用虞泉枯井竭則汲者告病惟神幸
哀斯民而賜之嘉澤使憂者以愉虞者以安病者以息

是一舉手而三患弭也神其可無意乎

諸廟謝雨祝文

迺季秋以來雨弗時至嘗以三患有謁于神荷神之靈
賜以饗答將萎之麥翦然勃興既涸之泉坳然充溢而
燥炎之氣反化為潤澤真所謂一舉手而三患弭也不
腆卮酒持酌于神維以薦誠匪敢言報

張大帝廟祝文

某曩在江東適罹歲旱凡所禱請惟神是依今在泉南

復值冬旱躬走祠下為民致祈信宿之間甘澤隨注將
萎之麥翦然勃興既涸之泉坌然充溢其拜賜也渥矣
不腆卮酒持酌于神維以薦誠匪敢言報

張大帝並通遠廟祝文

古者春秋祈報非大神不與蓋農重事必其威靈震赫
足以闔闢陰陽召呼雷雨者然後可望以豐稔之施惟
帝王功參造化澤被生靈為日久矣屬此中春虔修時
祀惟王鑒其念民之切而再賜以上熟豈獨為吏者知

金史卷之八十二
卷五十二
德於王民亦永永事王無怠

諸廟謝晴祝文

比者洪濤山涌之日雨復甚至其勢蓋廩廩也使開霽
少遲則平疇萬頃皆將卷為巨浸矣幸神靈加惠茲土
使雨隨止而川不溢芄芄之苗賴以獲全厥施豈淺淺
哉不腆樽酒予以告虔尚惟相之迄俾有歲

辭先聖祝文

昔者祗謁云初嘗以服膺洙泗之訓自列於先聖之前

雖在官三年恪守惟謹然其可愧亦多矣蓋學有所未
充則政有所未善固其宜也易鎮江西責任彌重將何
以稱塞惟當益尊所聞庶幾萬一之進於皇元聖尚迪
其衷

諸祠祝文

假守是邦于今三載材疎政拙有愧前修獨惟此心庶
幾膂合叨恩易鎮敢不告行

忠孝祠祝文

祠二公以範風俗自某焉始叨恩易鎮遂將去此惟當
監勵忠孝之節以無忝於二公皎然此心尚靳昭鑒

遊仙山頂祈雨祝文

昔者真人之始封也綸告誕揚固有愛利及物之褒矣
今境內之早前所未睹風日炎煬良苗將萎此正真人
推行愛利之時也夫雨暘之數雖出於天然上穹至仁
易以感格山川百神儻能為民致請未有不能回造物
之意者况真人列名仙籍隸職紫清又非山川百神之

比何惜不為一方赤子致其更生之請乎今旱勢極矣
民命危矣於此時而不亟亟救之後將無復可望者矣
敢以誠告尚其念之

周真人祝文

謹以素饌昭告於勅封沖應真人靖惠夫人曰有崇斯
山作鎮南浦真仙宅焉多歷年所庥吾一邦厥施甚普
寶軸綸書光賁琳宇實帝令之俾職茲土維時常祀曠
典是懼莪莪儒纓相帥作古有飶斯馨有清斯酌俶聞

其端日歲壬午維仙之飲玉液淋露維仙之饗豹胎麟
脯豈伊區區可薦尊俎物雖甚微誠意攸寓賤是賓興
敷詔萬宇得拔其尤貢于天府凡茲士類志在軒翥維
吾真仙各傳以羽如鵬之運如鵠之舉闕如蛟龍得被
風雨逢辰效竒立功至主豈人實能維仙默助若甄之
陶若冶之鑄洋洋文風視被鄒魯英英人才媿昔伊呂
於鄉有光於國有補茲願甚宏非仙疇予尚惟至赦仁
此覩縷

北山祈雨祝文

維年月日具位謹以清酌之奠昭告于北山之神傳稱
名山大川能興雲出雨者始在祀典溫陵為郡以泉得
名有崇北山實州之鎮神仙所宅霧雨所藏一方仰庇
惟日久長今歷旬不雨多稼將枯羣情慙慙若隕川谷
願以靈源一勺之水散為闔郡三日之霖使槁苗復興
民命獲濟此神之職也亦邦人之望也謹告

社神祝文

維社有神實主我民曰社與民厥重惟鈞歲旱民饑亦神之疚願於未然畢力以救

勾龍氏祝文

於我惟神於祀配食有功於民故莫能易雨不以時民且告瘁神其揀之反掌之易

稷神祝文

維稷有神所主惟穀雨暘以時嘉穀乃熟芄芄者苗賴雨以濟尚哀斯民俾克有歲

后稷氏祝文

惟神之生百穀是殖更千百年祀以為稷今穀方茂而
雨不時哀而救之匪神執尸

風師祝文

在易有之雨潤風散其於生物功則一貫雲氣凝合雨
乃滂注所求於神願霽斯怒

雨師祝文

瀕海之邦土瘠易槁潤澤不時則以旱告一雨通宵已

拜神賜願更滂沱俾卒有歲

雷神祝文

鼓動萬物惟雷之功有神司之隱隱隆隆惟霆之轟雨
乃大至敬共有祈日夜以冀

北山祝文

古者諸侯有國凡境內之山川必有祀焉後世祠廟既
興而山川之祀遂廢徒知像設儼然而謂神明在是而
不思興雲雨以澤百物者實山川之功顧寢而不祀可

乎某蒞事云初適以旱告徧走羣望而北山獨先焉豈
非以其巍峩尊雄上與天接雲氣所自出故歟頃者一
雨通宵已拜神賜矣邇日以來旱氣彌烈神能賜之而
不能終之殆非某之所以奔走乞靈之意也敬持瓣香
載控忱悃興膚寸之雲以雨四境使人知山川之功不
在祠廟下豈不休哉

清源洞祝文

乃者中夏以來農畝告旱比雖得雨而潤澤未周瞻彼溥

原將復就槁羣情蒼然如墜蒿炭仰惟至人超出世表
與造物游名呼神龍噓吸雷電惟無意斯民則已倘誠
有意則為一方赤子以請命於天興膚寸之雲以膏潤
四境直反掌間耳惟仁慈其終念之

東嶽諸廟祝文

某自玷守符居慚善最惟三載極憂民之念而一毫無
營已之私質諸明神庶幾無媿叨恩易鎮敢不告行奉
親在涂尚靳陰相

辭清源祝文

某假守三年茂焉聲績惟於斯民念軫晨夕十日不雨
以旱為憂五日之雨又虞橫流區區此心實貫天日銷
變名和則媿無術有崇北山真仙宅焉駕風鞭霆妙用
無邊某以誠求仙以誠答有如鼓鍾應手鐘鎔百穀穰
穰羣氓熙熙維仙之功豈人之為既列於朝加以顯號
又錡於梓悠遠是關今雖去矣忍忘泉人願言蔭佑終
古常新山茗澗泉薦此芳潔神交窈冥則未嘗別謹告

仙遊山頂祈雨祝文

辛巳五月
時憂居

竊聞之天以雨暘之柄付之山川百靈猶人君以刑政
之事付之牧伯守宰也民有戚嗟愁歎之未伸牧伯守
宰不得而專者當同心以請於朝廷然後民瘼可蠲歲
有旱乾水溢之不時山川百靈不得而專者當同心以
請於上穹然後災變可息蓋推行天地之仁者山川百
靈之職也推行朝廷之仁者牧伯守宰之任也顧焉有
幽明之間哉夫雨暘之數雖出於天然上穹至仁易以

誠格今境內之旱可謂酷矣回造物之意而救生靈之災正此斯民有望於山川百靈之物也伏惟慈仁母以定數不移諉諸天而以為民請命者任諸已使甘澤蚤沛而嘉穀獲全神既有辭於民民亦永永事神無斁謹告

鰲峰靈澤殿祈雨祝文

勅封靈澤夫人大仙惟大仙之靈肇於百丈一方之人所共瞻仰於茲有年矣間者靈澤之封實定於某之手

夫豈諂大仙者哉有是實故有是名大仙之所不辭亦
某之所不得私也迺者聞諸道涂大仙復將震耀威靈
於鰲峰之上其事甚異其詞甚夸人皆信之某獨疑之
何哉蓋澹然無作而雨暘菑疾之求各以其類應此正
直之神所為也以禍福動愚民而要其不正之享此淫
昏之鬼所為也孰謂大仙之正直而肯要人以奉已乎
此某之不得不疑也及抵西山及有以其親覲告者真
若可信而無疑矣某之愚猶恐其出於依托也蓋大仙

之所以信服於邦人者亡它惟仁而已今不恤其民之
有亡必欲其差闕出錢以廣宮室豈大仙之心乎若某
不審其事之真偽而竭蹙聽命焉非惟見嗤於士論且
將獲臯於大仙矣是以未敢即任勸率之責而願有謁
焉厥今高下之田方以旱告大仙誠能大庇斯民而亟
賜以雨使穀之將收者無秕而不實之患而欲槁之苗
蓊然以興則環數鄉之民將奔走稱謝之不暇某於是
時慨然任勸率之責亦為有辭矣敢布腹心惟大仙實

圖之

南嶽行宮祝文

某之為學也以不欺為本雖未能至而竊有意焉屋漏之隱如對神明不敢忽也况今作屏乎茲巍巍靈嶽雄峙天表顧盼在目雖欲自欺得乎惟廉惟仁惟公惟勤朝夕兢兢期於無愧尚惟降鑒迄用有成


社稷祝文

維社稷有神民命所司泣事之始職當按視鞠躬拜謁

不敢不虔農事將興尚期陰相雨暘以叙俾克有秋

城隍祝文

城隍之有神猶郡國之有守幽明雖殊其職於民則一而已某叨蒙上恩來鎮此土深惟責任之重凡躬行之當勉與民瘼之當紓朝夕兢兢不敢自忽至於蠲除菑沴丕降福祥則神之職也尚惟加意俾寧厥居民亦永永事神無忘



西山文集卷五十二

欽定四庫全書

集部

西山文集卷五十三至五十五

詳校官廉吉士_臣張溥

總校官降調編修_臣倉聖脈

校對官編修_臣沈清藻

謄錄監生_臣張誠智

欽定四庫全書

西山文集卷五十三

宋 真德秀 撰

祝文

潭州謁先聖祝文

癸未正月

昔某之治泉也惟節用愛人之訓是服是行其去之日
不獲臯於泉人賴此而已今者叨蒙上恩作屏南楚委
寄之重又非泉比將何以免責哉惟於所謂節用愛人

者益勉其所未至焉某始祇謁於庭炯焉丹誠尚冀昭
鑒

先賢祠祝文

濂溪先生周元公明道先生程純公伊川先生程正公
武夷先生胡文定公五峯先生胡公南軒先生張宣公
晦庵先生朱文公聖學不明千有餘載數先生相繼而
出遂續孔孟不傳之統可謂盛矣惟時湖湘淵源最正
蓋濂溪之生實在春陵而文定父子又以所聞於伊洛

者設教於衡嶽之下張朱二先生接迹於此講明論著
斯道益以光大然則天之生數公也所以幸天下與來
世而湖湘之幸抑又多焉類宮有祠其來尚矣某雖不
敏然於數先生之學蓋嘗用其力者而庸駑之質欲進
未能叨恩假守用敬謁於祠下緬懷遺風當益自勵冀
於斯道或有聞焉施之有政庶乎寡過惟先生其相之
幸甚

漢高文帝祝文

漢太祖高皇帝太宗文皇帝惟漢之興繇祀四百深仁厚澤肇於高祖而成於太宗威神在天實相下土若時楚服廟貌在焉惟二帝之心今之嘉忠湘民者亦無異於昔之愛漢赤子也某叨恩假守敢不告虔尚惟默佑俾克用乂

漢長沙文王 長沙定王 長沙陶公祝文

傳曰君子賢其賢而親其親小人樂其樂而利其利是以沒世不忘也夫為政而使民沒世不忘斯亦難矣王

之受命國於茲土蓋千有餘祀而民奉嘗之如一日也
嗚呼此豈可以智力求哉某叨恩假守敢不告虔尚惟
默佑俾克用乂

三閭大夫忠潔侯屈公祝文

某之後先生也蓋千有餘祀而於離騷九章一讀一興
歎焉甚哉先生之忠於國也世降俗末媚佞成風過其
祠者可以泚厥頽矣某雖無似願師其人於千載之上
視事之始敢不告虔履潔含忠益當自勉

賈太傅祝文

某之後先生也蓋千有餘載而於太息流涕之書一讀

一興嘆甚哉先生之忠於國也

下同
忠潔

端潔譚公祝文

譚端潔公昔新莽氏欺天誣衆盜有神器時則龔大夫
凜然抗節不食而死著在青史至今猶有生氣靖康之
難古昔所無而在廷之臣甘心屈膝於偽楚之庭者不
可勝數惟公秉志之死靡渝橫流滔天中屹砥柱易名

曰潔與龔同稱某叨領守符偶在公里顧瞻潁水祠像
在焉清風襲人千古不泯酌以卮酒嘅其永懷

忠節十位祝文

昔者王厚之難晉氏危若綴旒惟時賢王實刺此州慨
然倡義志殲兇逆羣英協輔共圖厥勲事雖蹉跌而一
時臣子知有逆順之理卒以滅賊其功豈不偉哉爰暨
本朝間關南渡敵兵深入蹂我湖湘卓哉四君寧死無
辱明綸誕布錫以嘉名與晉諸賢實同廟祀激勸之指

厥惟深哉某竭耒殿藩獲瞻祠像酌以卮酒慨其永懷
春祭諸廟祝文

春之有祈豈惟故事民之望歲蓋出至情矧以非材甫
茲假守慨念長沙之故國也非樂土之舊風將靳庶俗
之均安豈宜一穀之不稔肆陳菲饌用敬靈聰曰雨曰
暘願協四時之叙多黍多稌迄臻百室之盈

祭太守禮部朱公 山長監簿周君 安撫忠

肅劉公祝文

兵麓
書院

五閨搶攘六經掃地人文尚闕學校闕如美哉朱公來
守茲土以經術導民而書院之教以興賢哉周君繼長
是山以德行見褒而書院之名以著中更圮廢亦既有
年維忠肅公丕振厥緒自堂而序輪奐一新教養之際
於焉大備三君子相去二百餘年而尊經勸學之心前
後如一祠像並設豈不宜哉某以非材繆塵分閭顧惟
涼德何以長民教化所先敢不加息肅容祇謁如拜下
風勉紹前規庶幾弗墜謹告

祭胡給事墓祝文

故武夷先生文定胡公之墓自熙寧以還新學孔熾春秋一王之法闡而弗章公聞道伊洛慨然以尊君討賊自任著為訓傳大義炳然使洙泗之道復明而荆舒之禍以熄其有功世教可謂盛矣某自少讀公書考觀行事高山景行仰慕何窮九原不作竊用興歎茲叨上命來鎮三湘惟公生於武夷而老於衡嶽既鄉閭之先哲又道德之宗師有墳其丘實在寓里屬拘印覲謁拜無

從爰遣祠官敬陳菲薦仍禁止其樵牧且訪問其後人
興起士風庶其在是英靈未泯尚鑒此心尚饗

祭胡侍郎墓祝文

昭告於故致堂先生侍郎胡公之墓惟公早侍家庭實
聞至道壯登侍從屢進昌言正章恭弄權之誅斥汪黃
誤國之梟英風勁氣獨立不回旋觸權臣遠擯嶺海方
且心潛魯語之大訓臆誦温公之遺編著為二書垂耀
千古某以晚出幸同鄉邦顧瞻丘壟適在郡境往致一

酌慰其子孫歿而不忘鑒此誠意尚饗

祭胡祠部墓祝文

故祠部郎中胡公之墓公以賢哲之嗣得家庭之傳著
通旨一書亦既有功於聖筆對權臣數語尤足深折其
姦心興言高風仰止惟舊往陳一奠用表寸誠尚饗

祭胡五峯墓祝文

故五峯先生胡公之墓昔者洙泗之門高弟甚衆獨魯
子傳之子思而子思傳之孟子為得其真自餘源遠末

分散為異端其亦多矣某嘗竊謂子思之功在聖門為
最盛蓋上能大其師學而下能授之英賢卒昌斯文孰
與之匹維兩程氏講道河南曰謝與楊得其要旨文定
早歲俱從之游既誠其身復以教子公之生也氣稟特
殊玩心神明不舍晝夜優游自得抱道以終爰畀其徒
曰子張子斯文有託誰之力焉仰視子思庶幾無媿某
以晚學緬懷遺風敬遣官僚往致一奠尚惟默相於道
有聞尚饗

祈晴諸廟祝文

東作方興惟雨是仰此豈禱晴之時也哉蓋氣數乘除最為可畏羸於今則或縮於後此守臣之所甚懼也今溝瀆川源在在充溢譬之飲食屬饜而已一或過度則反為菑此又守臣之所甚憂也况積滂則麥為之傷食濕則蠶為之病休戚所關皆非細事是用齋心潔慮禱於有神埽除陰霾丕煥霽景在神直易爾以神之所易解吏之所憂惟慈仁其亟念之幸甚謹告

嶽麓湘江祝文

祭法有之山川丘陵能出雲為風雨曰神又曰非此族也不在祀典嶽麓湘江之為山川可謂能出雲為風雨者矣而春秋之祀顧弗之及非曠典與屬茲霖滂惕然興懷方念即爽塏之地以望而祈焉熙暘遽升天宇清霽矣是用易祈為謝且繼今以始與祈報之禮焉郡計少紓又當立之壇壝永為嚴事之地神其大芘茲土錫之有年俾人知山川之功章灼不可誣如此豈不休哉

謹告

社稷祝文

凡禱祈之事必先社稷禮也屬者霖雨過度幾於靡神不請矣而獨未及於土穡之神此某不知禮之臯也媿懼之念方惕然於中而雲陰劃開霽景呈露矣是用躬拜壇壝之下既以為響答之謝顧自今至於秋成其為日尚遠而所望於神者益深惟時其雨暘無過與不及俾年為有年則土為樂土其敢忘神之太惠也哉謹告

諸廟謝晴祝文

迺季春以來雨澤過度輒抒誠悃禱於有神朝夕嚴恭
以俟嘉命畏蒙響答若鼓應桴甲子之朝垂霖沐矣清
風既發羣陰劃開宿麥將登庶幾有望穉苗日茂抑又
可期嘉與斯民共拜靈貺尚惟矜憫迄畀有年謹告

諸廟祈雨祝文

俗以仲夏再挾為分龍之日曰雨曰霽歲之豐歉於是
而占焉儲粟之家亦必俟是日之雨然後肯泄其所藏

以惠閭里其利害豈它日比哉載念湖湘實為凋俗歲
雖告稔民食尚艱一有不登立見擠壑是用先期三日
以奔告於有神惟神愛民之心不減於守土之吏幸哀
而憐之賜以滂沛之澤則一稔可卜百憂以寬拜神之
賜寧有紀極謹告

諸廟謝雨祝文

比以龍會之辰膏澤是望輒殫忱悃禱於有神荷神之
靈甘霖隨降有禱有謝惟禮之常爰飭有司肆嚴昭答

然壬戌欲雨而遽晴甲子欲晴而小雨繇批政之多有
且愚誠之未孚退自省循敢不祇懼尚靳於宥變沴為
穌迄俾有年庶全民命尚饗

諸廟祝文

六月之雨聖人筆於麟經其不厭數也明矣惟潭之為
郡實瀕大江雨未彌旬則怒濤歛薄下田之稼凜乎其
可憂况益水之陽為山之源以汎溢告而相陰人以滂
聞矣則某之所以奔告致祈者其庸敢後乎惟神至仁

早賜開霽庶全一稔以惠我民謹告

諸廟祝文

乃者分龍之望雨神既幸惠之矣雨足而慮溢又惟霽之望焉求之於人且厭其數况神而可瀆乎然區區之誠方動於中而杲杲之日已赫乎其在上矣嗚呼神之格思不可度之如此繼自今其敢不愈敬之哉尊酒告虔匪以為報尚饗

祈雨祝文

七八月之間旱從古以來病之蓋良苗之將穢猶嬰兒之欲長膏澤之弗繼猶乳哺之失時命之存亡於是焉在其忍安視而弗以告乎惟神不愛須臾之勞以拯其垂絕之命使民獲有年之賜則吏其敢忘神之功謹告

祈雨諸廟祝文

昔者呂氏之書以秋行夏令為舛漢人論允離之治亦各有其時焉自履素商月有半矣而蘊隆之虐方熾膏潤之澤甚微誰謂九秋乃如三伏陰陽失叙莫甚於斯

批政干和敢不自省惟神赦吏之臯憫民之菑油然而
雨伯非特洗敲煩之氣抑以全豐稔之功稽首投誠立
俟嘉應謹告

祈晴祝文

乃者穀方華而旱某以為請而神畀之雨矣今者穀既
成而雨某又以為請神其可無意乎蓋前日之旱猶嬰
兒之失乳今茲之雨猶飽而將疾二者俱危道也然吏
知其危而憂之而已若夫憂之而人能揀之非神其孰

望乎今事勢亟矣一日之雨則禾有一日之傷如拯溺
然不可緩也惟神毋愛須臾之勞而賜以旬日之霽使
民不失終歲之望神亦無廢前日之功謹告

謝晴祝文

秋大熟未獲方興銍乂之功雨三日為霖懼失豐穰之
望爰潔齋而有請荷慈憫之亟從開靈麓之嶽雲煥扶
桑之麗景霽逢甲子獲寬傷稼之憂時近孟冬行畢滌
場之役敢申祇謝仰答殊恩尚靳彌月之晴迄保有年

之慶臣某無任激切感荷之至謹告

祈雪祝文

考記傳記雪為五穀之精故盈尺之瑞可占豐年非苟然也比者涓選剛辰將有祈於祠下而誠意甫啓嘉應遽形玉霽繽紛疇不欣覩是用易祈而謝因謝而祈願於臘前錫以三白拜神之惠其曷敢忘

祈晴祝文

迺自季春以來霖雨過度頗聞田里之間穀已播而厄

於寒蠶方育而病於濕二者皆民之大事一或失望將何恃以為生况穀價未平物情正鬱而陰霖弗止憔悴可知此某所以憂愧怵惕而有祈於神也惟神之威靈揀此宜無難者四淑氣於暮春閏新晴於甲子使憔悴者頓釋而憂愧者亦以少紓其敢忘神之天賜謹告

祈雨祝文

詩曰芄芄黍苗陰雨膏之言苗之方盛非雨無以滋之也况仲夏之月其節曰芒種其候曰分龍必潤澤以時

則豐穰可卜農書之占厥有常驗此某之所以奔告於神而不敢後也自春以來民困貴糴今數月矣吏雖百方以救之未能大有濟也惟入梅之後與分龍之日膏澤應期而至則民之蓋藏者盡出糴賈不抑而自平此在神一舉手之功爾矜民生之久困察吏術之已窮惟明神其垂意焉幸甚謹告

謝雨祝文

比以農書之占曰芒種曰分龍於望雨為尤切用敬禱

於有神迺丁未遂雨甲寅之後三日之間又連錫以雨
鉅室之藏於是乎稍出而豐年之應於是乎可期荷神
之施腴矣維嘉穀之方苗猶穉兒之仰乳願神不倦於
賜而有以終之使久困之民早遂一飽之樂則吏之所
以圖報者其曷敢有忘尚饗

仰山祝文

惟山之威靈德澤肇於大江之西而延及於重湖之南
有衆恃之以為司命屬者征行厄於風雪過棗之日有

金史卷五十三
卷五十三
謂於王霽景遄開遂以善達惟時湘土離宮在焉賴神之休自此焉始鞠躬拜謁其敢不虔

真武殿祝文

於皇上聖威神在天誕降福澤於民俾有寧宇某之祇事為日久矣叨恩分閭而靈宮在焉涖事之初敬伸謁款江湖之間沴氣易作尚惟慈憫弭於未然區區之誠仰祈昭鑒

祈晴祝文

比以霖雨過期煖氣弗効用祇謁於明神荷神之仁不
以為瀆煥晴光於甲子回淑氣於暮春凡某所求厥應
如響顧何以得此於神哉惟時細民方苦貴糴併靳於
澗密運化機俾氣序之不愆則蓋藏之畢出惟神其終
念之

諸龍潭祈雨祝文

廼者甲寅以後之雨距今甫半月耳炎風烈日相為煽
薄故雖下田之水亦有竭告者况高仰之地乎吏有從

田間來者以為數日不雨則多稼可虞自聞斯言膺肺
如灼蓋民之窘於貴糴於茲半載矣盼盼焉惟早稼登
場是望以紓其困以捄其急者非常歲比也今嘉穀方
苗而膏澤弗繼一或失望其將奈何此某之所以痛心
疾首而有禱於龍君之靈也郡紱所縻不克躬詣而遣
官以前惟龍君之神變迅速興雲雨以澤萬物直一噓
吸間耳以一噓吸之勞而可以救數十萬生靈之命龍
君其肯靳乎敢再拜以頌

上封雷池祝文

迺者尉掾之行已控忱詞請命於龍君矣區區悃誠尚慮未徹謹泐遺簿正以前蓋信宿以來旱氣熯熯益甚前日大田多稼凜然可虞龍君而不亟掾之則後雖賜雨將無所及矣幸哀而憐之不惜一嘔吸之勞而全數十萬生靈之命龍君之功之德所以簡於上帝者又將如何哉敬再拜以俟

靈湫請水祝文

間以旱勢可憂遣官致禱於靈湫矣

小洲曰祠所

今旱氣日

熾其為可憂又甚於前念非躬禱不可印綬所縻願莫

之遂是用恭迎靈湫之水安奉於郡庭

中洲曰恭迎神位

伏願

章示威神使油雲鬱興陰風慘變從車蓋而來崇朝之頃霈為大雨則龍君之有大造於茲土也其可以限量計哉某謹帥吏民敬共以俟

零陵王廟祈雨祝文

惟王之威靈著於湘土某知所敬仰久矣歲時禱祀諉

諸有司而不以身親焉則某之臯也今旱勢甚酷羣情
嗻嗻學校之士以為王於早潦之求無不響答特未嘗
頗有請而已某是用矍然為愧且懼俯伏祠下控誠而
拜禱焉幸哀斯民亟賜以雨使歲事獲全而人無流莩
其所以圖報於王者其曷敢有忘

西濟王後殿祈雨祝文

維聖母有池靈變甚異見於崇寧間守臣李閱之記屬
茲亢旱羣情皇皇而此邦之民乃有以刻文來告者某

甚恨知之不蚤也謹命幙僚恭伸禱請伏惟慈仁亟彰
嘉應使膏澤隨霈嘉穀獲全則某所以答靈休而侈神
貺者其曷敢不虔敢再拜以請

南嶽火德星君祝文

比因亢旱虔致禱祈恭遇南方火德執法星君正臨軫
宿下照長沙臣已卜日躬修醮謝冀蒙福佑潛弭旱災
而臣適有瘡瘍之疾未敢祇謁高真謹令儒林郎武安
軍節度推官趙希憲先詣殿庭代陳忱悃伏望聖慈俯

賜矜憫推旱魃於熾張之際霈甘霖於愆亢之餘俾歲
事獲全民命可續嘉與闔境王靈共拜更生之恩謹俟
疾平亟酬忱願仰祈聖察

社稷風雨雷神祈雨祝文

天久不雨良苗將槁磬磬下民大命近止肆陳菲薦力
請於神膏澤沛然恭俟嘉應

岳麓湘江祈雨祝文

諸侯之職當祀山川

岳麓云靈麓巍巍
湘江云湘江洋洋

此土之望肇新

壇壝亦既訖工屬茲亢暘敬伸禱請雲興膚寸澤洽一方願彰厥靈以拯民命

諸廟祝文

在詩有之早既太甚蘊隆蟲蟲又曰旱魃為虐如悛如焚昔蓋聞之今乃親見咎由牧守民焉何辜以神之仁非無意於濟物者而懇祈屢矣迄未之應毋乃天數流行有非神所得專者乎采諸衆言惟碧玉之醮功力最大已消良日祇按闕科螻蟻之誠懼難上達願神哀此

下土亟控請於昊穹庶幾回眷佑之仁而膺潤澤之賜
使大田多稼不至甚損而生靈之命尚或可全所以圖
報於神者其曷敢有已

祠山忠靖祝文

維帝王威靈蓋已受命穹昊為百神之宗其於掾旱乾
致雨澤非難事也迎奉以來幾兩旬決嘉應屢闕而膏
施尚屯意者公庭煩牒之地非神之所安是用還於靈

祠就伸禱請

諸廟祝文

自龍君之來境內之雨者屢矣然潤澤則有之而霑洽則未也或謂龍之為神動則升霄漢靜則安江潭公庭

之煩媠非所樂也是用還於靈湫

五龍安濟云靈祠

就伸禱請

今旱勢極矣蚤稼之傷者已不可復全而下田晚稻苟得一雨霈然充溢則尚庶幾中熟之望龍君亦何靳一嘓吸之勞而不以掇千萬人於溝壑乎非薦肅陳以寓誠意尚惟歆饗亟副所期

洞陽祝文

間者早暵為虐既靡神不舉矣采之衆論乃白威靈之
章灼莫洞陽若顧未嘗致請焉此某不敏之臯也是用
諏僚屬以往拜於庭而遣之區區此心蓋已飛馳於靈
湫之上矣今早氣如焚耗斁已極而奔霆走電大霈甘
雨在龍君之力為無難願以一噓吸之勞而救千萬人
溝壑之難非惟斯人蒙澤吏亦與受賜焉圖報之典不
敢忘也謹再拜以俟

社稷以下祝文

間者將用道家法致禱於紫微太乙之尊念螻蟻之誠未易上達也則有謁於神願為請命昊穹亟賜之雨越孟秋戊戌陰雲鬱興膏澤密布實維明神陰相之力然早乾既久滲漉未深雖槁苗少蘇而溝塍之水則涸竭猶昔也立秋之期近在旦暮事勢亟矣及今而雨足則早稼之未損者猶可全一或少遲則晚苗之方茂者亦告病矣危機交急莫甚斯時是用不避瀆煩復伸懇請

以神之仁必不忍為賜之不竟也敢跼蹐以俟

五處龍王 上封雷池祝文

比繇舛政名致旱災有謂於龍君之靈龍君數不以為
瀆曰是知過而能自儆者也入秋以來屢賜之雨雖早
稼或虧而晚苗甚茂儻白露之前更賜一再之雨則歲
功畢矣謹命僚屬且謝且祈龍君之仁其尚念之

祭龍壇祝文

比以時澤未浹古之雩祀有所謂象龍致雨可考蓋三

代之禮也乃立壇壝將徧象五方之龍而致禱焉自北而東雨已隨之嗚呼其亦可謂靈也已肆命邑長祇謝於神白露之前更斲甘霖迄為有年則某將廟而祀之不敢忘龍君之德也

諸廟謝雨祝文

比以亢旱有禱於神入秋以來屢霈甘澤雖蚤稼少損而晚禾勃興神之為賜大矣不腆菲薦於以告虔尚惟終惠迄遂中熟

諸廟祈雨祝文

乃者蚤稼將登既厄於夏旱矣今晚苗方盛而雨復不
時是猶尪羸之人一疾未瘳而再疾隨之也嗚呼此豈
明神之所忍邪甘霖沛然一洗枯槁在神特指顧之力
而民免溝壑之憂再拜以祈上俟嘉應

諸廟謝雨祝文

比以嘉穀將登雨弗時至用有謁於明神誠意甫殫孚
答如響霈然膏澤高下均霑神之為賜盛矣今距收刈

之期尚隔旬月惟無暴風無淫雨則晚稼有十全之功
斯民遂一飽之樂神其終惠之幸甚

佑聖祝文

欽惟佑聖芘此一方雨暘之祈遙應如響一新殿宇庸
答神庥工役方興不無震動惟神宥相迄用有成

保安赦祭諸廟祝文

聖皇臨御餘三十年翼翼小心對越無媿茲愆調豫率

土驚欽憂奉祭書禱於靈嶽

諸廟云
靈壇

願言降監

諸廟云
降格

密佑聖躬即遂清寧以福方夏

起夢筆書堂告土地祝文

某惟此山得名自江憲公始先正楊文莊又嘗讀書於
茲某也不材敢望前哲屬以屏居窮巷思得山林閒曠
之地以為藏修息遊之所而僧以是告捐田數畝質而
為草堂揆日之良肇庀工役朽材腐瓦苟以集事惟神
默相亟臻厥成謹告

祭大仙祈雨祝文

嗚呼噓風霆噴雨露變化倏忽莫如南臺百丈之山而
普照靈澤實以帝念典司其間夫以佛道之尊仙道之
大固萬靈之所聽命而巖洞之幽邃湫淵之深窈又神
龍之所蟠宜其百數十年以旱致禱者莫不猶響之斯
答未嘗有如今日之艱豈佛與仙之仁無意於拯此土
之厄乎抑天時之當爾而天意之未還嗚呼昔歲之饑
民病極矣雖去冬一稔曾未蘇其痍癥儻或再歉則顛
連於溝壑歎呼於山谷殆將何所不有豈容一日之少

安然則今茲之豐凶乃民命存亡之決而賜雨之淹速則又豐凶之所關此某之所以望雲霓而涕泗瞻原野而辛酸也吾佛與仙之仁於此而不亟拯則是寘斯人於度外而坐視其塗炭昊穹至仁必不忍以萬物為芻狗吾佛與仙儻為斯人而力請則天意一回化驕陽而為霖雨殆猶反掌之非難嗚呼事勢迫矣民望極矣吾佛與仙真之拯不可不亟矣是用寫哀誠而嘯想敢罄竭其肺肝興玄雲之靈變沛大雨之瀰漫起禾稼之將

枯洗瘡痍而復完則某將大書深刻於巖石之上昭聖功之不刊嗚呼謹告

再祭大仙祈雨祝文

嗚呼旱勢酷矣三日不雨則高下之田蚤晚之稼皆無遺育矣方來之禍將無策以拯而生民之命不可以復續夫以普照靈澤之仁寧顧忽然於此今翠峰龍君之來衆聖咸集豈不能力回造化而為一方生民之福敢殫誠以致祈冀響應之遙速也謹告

三廟祝文

某奉祠竊粟無補秋毫茲叨誤恩復臨舊郡控免弗獲
消吉問涂惟神默相此行俾長幼均安道路無虞到郡
之日舉措適宜利澤及物前有粗立之效鄉閭寧謐災
沴不生後無卻顧之憂則拜神之賜大矣不腆酒殽具
將誠意

武濟廟祝文

昔者漢室龍興王實舉百粵之師佐寬仁之主滅強暴

之敵措天下於乂安功烈偉矣廟食閩中垂二千祀而
護國之忠庇民之惠益有加焉比歲盜起汀樵一道震
駭盪除兇孽雖王師致討之力而默扶陰佑賴神之賜
為多駿騎騰山紺蜂螫賊靈應彰灼有不可誣者某猥
以非材分符舊服維泉為郡實王統臨之下是用虔修
謁款控露寸衷尚惟慈仁宥垂鴻覆俾封域晏寧菑害
寢息或有為民禱請者當北鄉祠庭而扣懇焉一念之
誠當蒙昭答不腆牲醴維以薦忱

五龍堂祝文

五龍之祠於祀典為最重某之至也嘗命官僚分詣而未克躬拜於庭屬以霖雨過度惕然不敢寧訊之幙屬謂王神靈變化莫測所當先禱焉用敢齊心有請願王以一嘘吸之間豁開陽明屏除陰沴留此嘉澤以時施焉庶幾穉苗獲全豐歲可望某與邦人將戴施於無窮其曷敢忘報

洛陽橋祝文

某蒙恩分符再蒞南土適當凋瘵之極未知振起之方
唯當誠意正心克已勵行拯民如飢溺遠利如垢汙期
以暮年盡銷愁歎儻或有渝斯志不敢復度此橋

又

某之始至嘗有矢言在官暮年刻勵唯謹雖煩苛粗省
而惠利未周回省初心媿負多矣叨恩有行未離本道
苟可以芘吾民者不敢不力惟神其終相之

西峽江祝文

某携家之鎮宵濟於江若時之春風濤方壯維神默相
如席之平不腆醪羞將此誠意

蓋竹廟祝文

某叨恩出守舊郡是臨道於靈祠敢陳菲薦惟王默佑
俾征涂之間災疾弗作到郡之後舉措適宜民俗晏安
舊觀以復庶無負朝家起廢之意異時代還謹當俯俸
以謝靈貺

南劍州判官廳土地祝文

某少遊幕府實藉神庥由此登朝浸叨華貫十有六年之間兩守泉州南皆謁款於神示不忘本也不腆牲酒於以告虔神其聽之介以景福

水口鎮廟祝文

某祇戍泉山道出祠下將就舟楫以達於大義之津惟神威德被於遠邇願垂洪覆俾順風安流無有驚阻則蒙施大矣不腆牲酒於以告虔明威赫然尚其顧享

泉州謁先聖祝文

某昔歲守泉慚無善狀茲由閒散被命復來或謂舊政則易乎舊民則易治嗚呼聖門之教一曰敬二曰信况以千里提封之廣萬民宅生之重而可以易眡之乎先儒有謂近世之臨舊鎮者政聲率不逮前由其有易心也矧某之愚其敢少忽兢兢朝夕若履春冰庶幾萬一或免於戾於皇元聖尚式教之

東嶽祝文

某昔者守泉首末三年年穀洊登寇攘寢息公私少事

遠近晏然豈某之智力能致是哉實神大庇斯民而錫之福也今復被命此來惟廉惟仁惟公惟勤所以自勉者不敢不用其至若乃人力所不及神其嘿佑之俾二氣均調百嘉咸遂田野安妥纖塵不驚豈惟某之踈拙獲免厥愆斯民實被如天之施

朱文公祠祝文

某不佞自少讀先生之書知理之與事同出一源而明德者固新民之本也二十年間洵更麾節亦知勉乎此

矣然窮理未精故應事多舛明德之功未至而求民之
新得乎被命重來益深祇懼尚思自勉庶有進焉

忠孝祠祝文

某昔者試郡立二公之祠於此慕而效之蓋將終身焉
去之暮年而執親喪不敢忘致哀之誼入踐近班兼陪
經幄亦思盡責難之益忠孝大端粗知自勉揆之前修
可媿實多被命復來式瞻遺像高山景行有慨於中酌
以一卮凜然興敬

蔡忠惠公祝文

惟公兩牧是邦德政在民至今未泯某實何人亦叨再
至緬懷遺跡可效可師朝夕恪恭庶幾萬一

王忠文公祝文

公之守泉才閱歲爾而德政在人有百年之思間者祠
宇之修某為之記蓋嘗妄論一二矣茲由間館再玷守
符緬懷清風益加敬慕九原可作非公誰歸

西山文集卷五十三